

宋詩紀事補遺

宋詩紀事補遺卷之十四

歸安陸心源伯剛父輯

余良孺

至和元年司勳郎中知嚴婺州神宗時曾孫渙  
以遺表蔭將作監主簿見臨川集三沈集有良  
孺大監致仕歸鄉詩

送梵才上人歸天台

卓菴臨海北山隈塵外門欹碧嶂開宴坐靜當明月  
塢高吟閒入白雲堆性歸禪悅都無礙詩繼名賢舊  
有才衰晚知師甚強健尙能眞筆惠書來天台續集

徐億

嘉祐元年以職方員外郎知台州修城見赤城志

巾山廣軒

勝景更新數步間北山遊得對巒屹凭闌愈覺雙峰峻極目無涯六幙寬特出喧卑資曠達所臨高遠壯遊盤炎蒸此地爲清暑莫厭攀躋磴道難天台續集

蔡承禧

字景繁江西臨川人嘉祐二年進士元豐中提點府界諸縣鎮公事太子中允集賢校理事述

詳宋史補傳

送程給事知越州

萬室羅紝千舸蓬遶山樓榭滿溪風舟移菡萏芬芳  
渚旌倚蓬萊縹渺宮翁子印還多事後微之名辱宦  
人中昌時青瑣朱轎貴白首誰何得似公會稽掇英  
續集

陸長倩

字子付福清人嘉祐二年進士元祐三年以朝  
請郎知台州明年三月轉朝奉大夫

遊碧照庵

松蓋松幢引步高躋攀終日自忘勞寒泉澄澈新鎔

鏡華棟崢嶸下冠鼈軒到嫩嵐濃欲滴庵依疊嶂勢  
偏豪雙旌暮迫城闕去止觀回應羨毳袍

又

早旦前驅出郡闡松隄石磴自無塵寒雲明滅天開  
嶺霜草青紅地展茵靈刹迥非勞世境淨庵常屬悟  
空人更憐萬竹千杉色不問嚴冬已早春

巾山廣軒

凌虛雲磴陟崔巍軒檻仍從絕頂開邑屋萬家迷向  
背江流三面自縈迴金山每恨波濤阻星石曾登培  
壠來爲是會稽東部郡不教更號小蓬萊

天台續集

蔣之奇屬有

南雄昌樂驛

城東湧水碧淵洞楊僕樓船向此來我亦編蓬今下  
瀨擬尋韶石上崔嵬

續武溪深

滔滔武溪一何深鳥飛不渡獸不能臨嗟哉武溪何  
毒淫以上馬援辭以下余所續飛湍瀑布流瀉雲岑砰激百雨雷車  
音吾聞神漢之初始開斷史君姓周其名煜至今廟  
在樂昌西苔蘚殘碑僅堪讀武水之源自何出郴山  
武縣鷹鳩石南入桂陽三百里峻灘洪濤互湧射其

誰寫此入新聲一曲馬援門人笛南方耆舊傳此水  
樂昌之瀧茲乃是退之昔日泛湖陽曾到瀧頭問瀧  
吏我今以遷來番禺事與昌黎殊不類未嘗神色輒  
慌忙何至形容遽憔悴但憐歲晚毛鬢侵故園一別  
至於今溪光罨畫清且淺朱藤覆水成春陰何爲在此  
此嬰朝簪翩然走馬馳驥駿南踰瘴嶺窮崎崟梅花  
初開雪成林韶石彷彿聞舜琴曹源一滴清人心遠  
民安堵年穀稔百蠻航海來獻琛嗟余才薄力不任  
報君夙夜輸誠忱布宣條教勤官箴有佳山水亦出  
尋樂平吾樂何有極不信絃歌武溪深韶州府志

李君以神漢桂陽太守周府君功勳紀銘爲示  
碑尾云大和九年五月重修歐陽永叔集古錄  
跋云此君檢漢書無之今碑石亡缺其名惜乎  
遂不見於世也南人紀其所修瀧水卽韓文公  
所謂樂昌瀧是也至今以爲利祠宇甚嚴云余  
讀韶州圖經云周史君廟在樂昌縣西北一百  
十八里武溪上舊經云後漢桂陽太守周君光  
開新瀧故立廟武溪驚湍急石流數百里昔馬  
援南征其門人爰寄生善吹笛援作歌以和之  
名曰武溪深其辭曰滔滔武溪一何深鳥飛不

渡獸不能臨嗟哉武溪何毒淫周史君開此溪  
下合眞水碑在廟中郭蒼文但云府君字君光  
而已其名訛缺不可辨圖經說周史君亦不著  
其名李君嘗往詣碑辨之乃是煜字永叔但得  
墨本故莫能考也余讀退之灑吏詩云南行踰  
六旬始下昌樂瀧獨疑樂昌昌樂之名不同遂  
移書以問李君荅曰樂昌縣五里有樂石尤高  
大當是樂昌以縣名昌樂以山名瀧在今縣上  
五里余乃釋然無疑矣因感馬援之意續而成  
之爲武溪深一章云元祐二年十一月三十日

番禺府中書

廣東通志  
金石畧

石門山

呂嘉妄欲抗中原積石江心尙歸然豈料王師到尋  
陋挫鋒困粟遂無前

樓船伏波安在哉曾兵曾破石門來昔年已過獲嘉  
縣今日更登朝漢臺

峽山

昨從湏陽來暮過峽山寺適聞新昌寇道路傳者沸  
余時不敢留一葦翻然逝雖經絕妙境已負清幽意  
捲簾坐船舷極目望蒼翠有如逢珍寶不暇貯篋笥

又如過屠門大嚼涎垂喙每欲問其詳曾莫得圖志  
道人山中來爲我譚一二犀去金瓊沈猿歸玉環墜  
趙胡垂鈎石歸然出江際穆王雙車轍想像常按轡  
漢晉五仙人曾騎五羊至俊靄二禪師神力與迎馭  
岩巖五岳塔初自崑崙施三祖石堪奇僧粲嘗所憩  
上方獅子臺下視見雲氣異花成帳幄紅紫嫣然媚  
蒙茸綠崖草莖葉相覆被或黃如金釵或白如珠珥  
造化窮天巧肖像名殊異梁間許渾詩壁上李翱記  
但知考事蹟何暇評文字清遠古中宿俯壓南海澨  
退之貶潮陽亦曾經此地幢碎逢颶風雷電助其勢

我來幸無恙恬然不憂畏祥飈送輕帆默已荷神賜

此歸會有日維舟就津次當爲小盤桓厯覽賞夙志

廣東通志  
山川畧

### 浮邱山

此山從古號浮邱攜手城西是舊遊法從未容穿豹尾守藩聊得步鼈頭傍連玳瑁遺亭近下有珊瑚廢井留得道丈人如可遇秋風挹袖上瀛洲同上

### 過蕪湖

除地誅茅懸左偏三山一碧正當前舍人爲寫湖陰曲禪伯請題城上篇帳下勁兵纏象魏櫨中飛騎控

巴滇至今庭竹根延蔓尙想當時七寶鞭輿地紀勝

遊狼山

一線橫大江千螺簇層巒空外飛鳥沒煙中片帆還  
輿地紀勝

鸚鵡洲

落日漢陽孤閣對秋風鄂渚數舟橫偶吟萬里飄流  
句獨倚滄洲憶禰生

朝漢臺

不終強屈蠻夷上稍復低回禮義中自昔一時成霸  
業至今千載仰英風

菖蒲洞

撥破紅塵入紫煙五羊壇上訪神仙人間自覺無開  
地城裏誰知有洞天又

泊武昌

圓壇展祀日樊山開宴時釣臺高巒峽離殿鬱參差  
以上輿地紀勝

休休亭

勢利煎人漫白頭休休去是良謀應須買取堪騎

鶴跨入芝田聞苑游

山西通志

題慧山寺

釋子幽居遠俗紛停橈登覽日將曛湖光已暝千年  
變山勢猶驚九龍分逆溜冷噴雙沼雪煮茶香透一  
杯雲偶因流落尋佳致何意聲名世外聞

遊慧山

還家豈不樂生事未應閑朝日已復去征鞍方更攀  
傷心百道水閨目萬重山何以忘羈旅翛翛醉夢間  
毗陵志

萍鄉

人家白雪中鳥道青雲裏耕斂競奔田魚樵喧會市  
秀出羅霄山倒流楊岐水三眞不可尋寥寥忽千祀

更想川兵時徘徊甘卓壘

萍鄉志

愛山堂詩

我愛通羊好民居山作城眼前無俗事枕畔有灘聲  
我愛通羊好環回雲水間重巒與疊嶂真是翠屏山  
我愛通羊好清無半點塵峭山多洞戶樵牧識仙人  
我愛通羊好青山便是城白雲深處宿一枕玉泉聲  
我愛通羊好煙霞冰玉間不須乘羽駕飛入翠屏山  
我愛通羊好深山不染塵數家原上住疑是避秦人  
我愛通羊好樓高如錦城青山常在眼澗水不聞聲  
我愛通羊好雙泉咫尺間不須尋謝屐步入九宮山

我愛通羊好宗英廻出塵文章與政事今復見何人

通山縣志

### 會山

我愛蓬萊編復此會羣仙仙人笑拍手索我瑤華篇

通山縣志

### 大泉洞

涓涓石含泉扁舟過其下大旱日望爾神功一飛灑

通山縣志

### 失題

三十六湖水所瀦其間尤大爲五湖中間可以置郵

戍隱然高阜如覆盂大開名園治亭榭時燕朱履爲

歡娛

時燕

高臺雄跨一千尺熙熙樂國遊華胥

華胥臺

堂軒峻疊青壁滑老蚌放開明月珠

明珠亭

蒼龍脫角

瑩且澤鮮瓜自與風雷俱郊家女子已仙去尙有故

井存通衢

玉女井

淩波羅襪塵欲起冉冉玉水翻紅蕖

玉堂

搖輝蘸影弄姿媚粉黛醉倒無人扶

搖輝閣

牡丹

芍藥開四達

四秀亭

品第未必揚州殊武陵迷春無處

問亭

迷春

杳杳仙路來盤紆流杯插花勸客飲

樂聖亭

霏

霜濺雪來坐隅

序賢

禱爵發鳴鏑

序賢亭

傳花疊語爭

喧呼主人能詩有仙格錦囊麗藻紛披敷擬驅輕駕

逐煙客

煙客亭

曠浪塵外天爲徒

塵外庵

夢得池塘生春

草一句我知今古無西歸定躡瀛嶠頂氣象早已居

蓬壺甘棠留愛在他日好事傳作淮南圖

夢草亭  
輿地紀勝

九峯寺

沿澗扳崖入翠霞寺僧猶寄舊鍾家芙蓉秀出天河  
外我欲名爲小九華

九子芙蓉畔傳燈彼一時誰無男女相試問末山尼

雲末峯

遙睇青冥絕險生山翁相指亂雲橫不知身世在何  
許但覺滿懷風露清

飛雲峯

翠巘龍蔥瑞色分嵐光遙映縷絲棼無心謾作奇峯  
勢何碍金烏出海門

香爐峯

天風飄飄浮紫煙誰把雪山香草然氣息不教落人  
世直上紫皇青案前

翠霞峯

輭金頰玉翠流輝天嬪新開雲錦機西望赤城標起  
處宦情欲逐野雲飛

蒼玉峯

翠滴溪橋水汎澄更深斜月映寒星巉巖何代點頭  
石臥聽高人夜讀經

芙蓉峯

擎天一柱萬山低九朵奇葩秀一枝多少好山僧占  
住空王曾會範圍基

流清峯

飛泉練白地無塵歛起千波湛寂身靜挾飛仙忘世  
慮郤喚塵世夢中人

峨眉峯

翠黛輕拖促曉粧雲歸鬟岫鬢蒼蒼道人欲識普賢

面西蜀重燒十願香

天竺峯

藜杖芒鞋興不窮萬山螺簇碧龍蔥青天一餉開圖  
畫漱灑收歸慘淡中

生雲石

藤陰稜石煜金科磊砌常將風雨磨剛被閒雲生罅隙  
禪僧迷失舊盤陀

以上上高縣志

燕窩石

墨窩化石鎖烟苔岩上茅空烟又開塵刦一聲清磬  
裏至今猶有燕飛來

德化縣志

萬年妙蓮閣

佛隴遺芳鮮儼蹤王張三觀揭禪叢圓明珠繫衣襦  
裏淨妙蓮生溼淤中再現石橋真法界重興銀地舊  
家風未應賦述誇孫綽序倡稱揚復有公

天台續集

松石峯

晚向津亭泊畫船忽聞佳處在雲烟松根化作千年  
石山寺蒸爲一澗泉祖意供看亭下柏禪交同結社  
中蓮明朝輿筭還躋嶺聊借僧房一覺眠

福州府志

望海歌

我來靈峰口滄海夜半起坐望海亭沈沈水面正陰

黑六龍啣日□未平□更陽谷光氣發五色變怪不可名洪濤洶湧□鼎沸蛟蜃伏匿魚龍驚金鴉騰署若木末烟消霧散□下明狂風喧逐簸巨浪猶似百面雷鼓鳴崩騰蕩沃□五岳鱗鬱磨碎鯨與鵬嘈峩忽駭陵谷變雪山千仞□際橫飄飄番船隨上下出沒僅若水萍忽然風霽□籟息金斗熨帖一練平碧波湛湛千萬頃參錯島嶼□杯罿三江五湖亦甚大視此乃類蹄中泓琉球佛齊□本國隱隱微見烟林青三山厯厯亦可數突兀下有□頭擰惜哉秦王不到此勞心徒欲求長生我雖流落□海上獨此寄

寓亦可矜行當結茅鍊金液以待九轉丹成仙飛  
羽化會有日直跨三島梯青冥他年故人或相問請  
來訪我於蓬瀛

福州府志

漱玉泉

斷崖天削成半腰爲坳窓殿閣在其中乃是釋子家  
初疑無路通去必凌紫霞屈曲轉山足雲蘿可攀擎  
忽然至其上金碧藏谿澗郤見岩下路目睛眩生花  
僧有定慧者來自蜀道賒五代方亂離相此山水佳  
卜居不復出焚香擁袈裟嗟余但企仰涉世空喧囂  
安得寄遁此可以忘幽遐

邵武府志

李中

中字至之清江人博學多聞與曾子固新淦三  
孔善嘉祐二年進士官朝奉郎致仕歸

宿臨江驛

候館寥寥輒棹過酒醒無奈旅愁何雨昏郊郭行人  
少葦暗汀洲宿雁多千祿已悲凋髮鬢結茅終愧負  
煙蘿篇章早晚遲知己苦志忘形自有魔江西詩徵

王無咎

字補之江西南城人嘉祐二年進士調江都主  
簿天台令棄而從王安石學言論莫逆宋史文

苑有傳

麻姑山

仙輶昔日此留連氣象遼遼尙宛然溪落斷厓爲遠  
瀑路從絕頂見平田千年芝有靈禽戲一洞雲留羽  
客眠已樂勝遊塵境外況陪清論酒尊前江西通志

林雄

名旦字子明福清人嘉祐二年進士累官監察

御史終朝議郎直祕閣河東運使宋史三百四

十三附林希傳

案慮爲旦之子見宋史三百四十三林希傳不言初名雄題云

示子慮則爲慮父無疑希宋史字子中或又作次中且字子明宋詩紀事作旦字次中亦誤

虎邱示子虧昔與次中游題榜尚存

一望家山上虎邱淒然魄動念同遊林巒不改如平  
日蒲柳先衰又幾秋敢學登臨小東魯却因零落恨  
西州鵠原寂寞歸鴻斷未拂前題已淚流

虎邱志

李渤

厲有

昌山

嶮嶮削壁武溪東聳起昌文疊秀峯空谷流聲渾管  
籥斷雲出岫倚崆峒依稀玉韞含輝曉爛熳花飛點  
翠融自是山靈開淑氣遙看拱璧鬱青蔥

詔州志

王觀

厲有

九龍巖

山寒蟄龍眠忽醒黃衣九老巖下行手持屈曲千歲  
藤慮驚世人藏姓名山前樵子折腰迎九老相顧笑  
不停摧天霹靂飛一聲舉目惟見煙冥冥開山老僧  
爲余說異事傳聞忘歲月至今山椒泉滿地赤白繞  
空中不竭好分餘澤入千家免使辛勤夜蹋車湖南通志

山川

隆化行駕

南畝桑麻無舊戶西園桃李變新妝

輿地紀勝

張思

毘陵人嘉祐二年進士元祐五年江西永豐縣

秦君亭

蟬蛻真爲一世豪雙蜩逐逐笑吾曹秦君已去亭長在著向山高更覺高

泉州府志

碧玉峽

野迥方知天廣大身高更覺石峩峩泉人試爲平章看勝絕何如透碧霄

泉州府志

醉石

席地爲茵寄此生涯樽獨酌有餘清簾衣和月臥不醒江上數峯雲自橫

泉州府志

麻臺文

官秘丞

游連山湧泉觀次文與可韻

得得朱輪到此山遲留共愛此幽閒人生勝事惟行

樂休問黃梁一嚮間

漢州志

張顥

嘉祐二年以職方員外郎知袁州

白雲樓

兩州花萼競相輝間斷紅塵一水涯輿地紀勝

黃通

屬有

涼軒

古邑已清曠涼軒尤灑然簷楹低竹樹城郭帶雲泉  
鑄冰孤吟地流觴避暑天應嗟吾土隘無處畜風烟

山西通志

峴山

仙翁移守千年春口書小子中自論口嗟羊公不血  
食乃表乞廟於山樊因復爲山發風詠辭氣浩浩涵  
胚渾又不東奔賤且鄙似欲領輞聯璵璠捧詩那能  
測崖岸但覺俗骨銷沈昏師丈之命重違辟手摩空  
腹強亦言召伯聽訟棠樹下後人思伯樹不殘羊公

遊處峴山首後人見山卽汎瀾或者怪之輒致詰厥  
口何惠施元元答云賢者豈徒爾其事雖遠迹可根  
昔者郊郿鼎旣口三姓竊出窺中原野鬼狂神盜社  
稷渴龍餓虎搖乾坤于是生物乃何物蛇豕口吻恣  
吐吞丁黃那復顧邦本荒城白晝啼幽冤口石未安  
晉已奪晉口將至漢之潰公來有意補膏血寧重黔  
首輕兒孫朝間疾苦厯萬室莫復遁逃開四門眾化  
以術公以道人伏以威公以恩口口口口用口口使  
民口戴如口口不然楚山盡奇秀豈特懷口口口村  
山舊有亭亭有碑碑前口見墮淚痕獨使庭堅忽不

祀可口今古多朱幡仙翁下車郡卽治旋日鞭馬城  
南奔踟蹰山頭念往事口不輕發心暗捫吾州祠宇  
數十百何功何惠牲牢殮而令公作奠教鬼嗟我庸  
敢誇雄藩玉書尋許口祀典庶令賢者終天存士民  
歡笑口口口口口口口新宮垣梁國入吳毀淫祠泰  
伯子胥古獨尊南陽守睦祠子陵浙東薄俗漸已敦  
仙翁還作叔子廟漢南又開風教源誠令身在誠名  
者收目仰視慙英魂鳳林古景絕無盡未算水木兼  
蘭蓀山前遊騎試思否此山不直供琴樽湖北通志金石

遊熙春臺

吾閩山永州佳麗發于邵中有登高山迥與蓬萊肖  
萬家雞犬環四面城池繞水老煙蒼蒼天低雲杳杳

秋興

訟庭無事意徘徊長嘯西風酒滿杯溪上小樓秋色  
裏一番新雁趁雲來以上輿地紀勝

遊麻姑山贈陳仲父李泰伯

麻姑山直斗牛角形勝擁斷東南隅五百年來蓄英  
氣特爲吾宋生真儒李姓觀名泰伯字風骨古秀飄  
鬚鬚其人於世少似者無乃稷契荀孟徒自傷出處  
苦奇剝不得寸祿遮妻孥歸來築室郡北郭反關唯

作文字娛先生之門足高第中間仲父有輩無曾繼  
先生列科舉簡編滿載三十車先生不遇子亦退高  
文懿行夸江湖麻原谷口田數頃歲計取足無贏餘  
生涯俯就隱意決便棄城邑廬郊墟上有茲親享甘  
旨下有子弟森庭除平生胸臆渺溟渤惟學虞卿窮  
著書平生志氣薄雲漢惟學子陵閑釣魚每當春秋  
社時候萬象瀟洒神仙居巖花野卉照几席溪風谷  
靄清襟裾先生乘興或往還殺雞炊黍開尊壺共評  
今古正經史不知口角清涎濡名教果有如是樂彥  
輔之言誠豈無蓮社竹溪詫高逸究竟未免歸狂愚

爭如仲父與泰伯相樂以道情愉愉文酒蓬迎二十  
載一日不見已爲疎松門大開俗不到水雲軒檻空  
清虛仰愛二友謹不與欲別仙墅猶踟躕

麻姑山志

黃履

厲有

此君亭歌次毛公韻

邂逅相遇三詩翁適我願兮以之東每乘高興卽同賦矧值修竹華嚴宮迫窮收乘勢相遠交我以淡情何重古來金石論賢達應求本自聲氣同清晨登此亭亭荔羅曾峯浮雲開白日金影升珠櫳高標不逐四時變翠色可奪千葩紅一日無此君子歟嘯詠已

不濃清風颯然至淵明喜動羲人容化龍況是葛陂  
杖待鳳幸列朝陽桐伶倫裁解谷律呂因雌雄太和  
尚可格天地煩想豈特疏心冒下逮漢蔡邕取椽製  
筠柯亭中與夫皮爲冠兮葉爲酒皆自荆揚之貢東  
南之美兮冒霜停雪拂景雲而榮惠風吾曹對此但  
欲適清樂不學渭川之人兮資千畝以敵萬鍾景定建康志

吳居厚

初名居實字敦老洪州人嘉祐二年進士厯官  
中書門下侍郎宋史有傳

梅山二首

尋溪小徑多盤詰車馬初來路欲迷千古英雄漢天  
子桑麻今已徧標題

連雲絕壁山無路濺石潺湲水有花試問昔時番粟  
麥何如今日種桑麻

湖南通志山川

吳王城

吳王宮殿作飛塵野鳥幽花各自春料得寒溪暄笑  
日也曾驚動武昌人

九曲亭

山上盤旋九曲亭春江滿目與天平青蘋白鷺漁家

屋幾幅輕綃畫得成 輿地紀勝

與部使同遊司空山

王官身已達所悅多紛華區區朝與市輕煖事窮奢  
我公味沖澹止樂山水嘉肩輿靡厭尋謝興無津涯  
杖藜適意遊野徑穿迂斜回憶挂冠時息此避喧譁  
骨相有神仙得道成全家遺蹟富覽觀高步凌煙霞  
靜中白日長玉宇清風賒覩茲神聖蹟喟然興歎嗟

湖南通志山川

胡揆

字少卿嘉祐二年通判襄州

見長編

神宗時累官

屯田員外郎知通州都官員外郎梓州路提刑  
見公是集及馮山安岳集山有送揆赴闕詩熙  
寧六年太常少卿知海州見長編卷二百四十

六

句

弄珠解佩風流古緩帶輕裘道味閑

輿地紀勝

裴士禹

開封人嘉祐二年西京留守推官見沈遘西溪

集卷十裴德輿墓誌

蜀先主廟古柏

武溪翊漢祠始欲大神器天命固有常雲雷極屯否  
流星墜武帳萬卒推銳氣孤負臥龍心三顧君臣意  
廟兒今寂寥握節空垂淚興廢事徒然無以窮往志  
陵前古柏樹千丈起平地根大壓巨鼈心虛藏野燧  
風動虬龍枝雷雨隨聲至疑是虛空間神明專擁庇  
不爾千萬年突兀無枯瘁觀柏又慘然念侯功業燄  
功業亘無窮與柏共蒼翠

成都文類

余京

會稽人嘉祐三年進士累官著作佐郎通判嵐  
州事

送程給事知越州

越守新除漢夕郎，刺繁從古籍才良。  
一麾偃息專方面，千騎雍容過故鄉。  
近侍暫虛青鎖闈，還朝行捧紫泥章。  
邦人喜慶今何幸，復見前龔與後黃。

會稽掇英續集

劉忠順

嘉祐三年衛尉少卿知福州累官尙書主客郎  
中四川轉運使

留題涪州石魚

七十二鱗波底鐫一銜，蓂草一銜蓮出來。  
非共貪芳餌，奏去因同報稔年。  
方客遠書徒自得，牧人嘉夢合。

相先前知上瑞宜頻見帝念民饑刺史賢石

留題資聖寺宗已嘉遯居

刻石

院幽庵更小嘉遯稱名尊展榻殊無地看山別有門  
潮來供菜圃雲過隔城村了畢如來藏任他風動搖

泉州府志

鄭少連

字儀魯仙遊人力學有文名嘉祐二年特奏名  
進士授劍浦主簿改許州判官以老致仕除大

理寺丞

寄茅處士知至

世爭趨捷徑君獨掩柴關名利紅塵老詩書白日閉  
性恬神氣逸琴淡古風還誰識冥冥意軒裳咳唾間  
仙遊縣志

單鍔

字季隱宜興人嘉祐四年進士博學明經箸吳  
中水利書見宜興志

題張公洞

松菊投荒山水間阿誰指點到仙寰洞門龍出雲猶  
溼石室丹成火欲寒百越樓臺摩詰畫三吳烟水季  
鷺閒陶然醉臥花間洞細納餘香滿袖還重刊宜興  
縣舊志

宋詩紀事補卷十四 男侍讀銜內閣中書樹藩校

宋詩紀事補遺卷之十五

歸安陸心源伯剛父輯

單錫

宜興人

聚遠樓

井邑銀山匝畫屏層簷飛翼入蒼冥  
日夜浸欄杆紫漢星春水漲來斜澗白爐烟抹去半  
峯青無邊光景歸吟日莫向樽前辨醉醒

德興縣志

林顏

字仲和希弟侯官人嘉祐四年進士終中奉大

卷一百一十五  
五言一王  
夫直秘閣

送僧歸護國寺

巋然傍勢浙江東不羨金庭第一峰法境常清五十里妙蓮今現幾千重清涼解洗枝頭露變現能飛鉢底龍平日舊遊今復到蒼崖邃谷抱長松

天台續集

夜樂池

石室巉巖五十里洞房七十二芙蓉夜池惟有仙家樂笙鶴時來古澗松

彩雲軒

曾是麻姑此降眞玉峯依舊碧桃春他年欲洗塵埃

眼得見紅顏散髮人

王得臣

字彥輔自號鳳亭子安陸人嘉祐四年進士厯官知唐州邠州元豐二年秘書丞四年提舉開封常平官至司農少卿撰塵史三卷見彭城集及長編塵史

黃鶴樓

昔人已乘白雲去舊國連天不知處思量費子眞仙子從他浮世悲生死黃鶴一去不復返光陰流轉忽已晚

柴皇洗腳石

柴皇徒步奔埃塵風雲未至四方屯石上無聊謾濯足泥蟠留此潛其神

大別山

大別山前拍湖水坐覺煙波幾千里碧山亭上秋興多四時清景森雲蘿故人領麾江沔口公暇登臨頻入手

秋興亭

忽來漢陽稱刺史又值魚肥酒偏美酒給公厨不用酣朝吟暮醉醉復醒郎官湖上秋興亭江山四向盡

可眺

漢陽

故人隔闊在東州  
煙波渺漫使人愁  
朝朝眼望頭陀寺  
夜夜魂飛黃鶴樓

句

漢陽太守文章伯  
政事多閑愛賓客

以上輿地紀勝

王鄰臣

字光輔

句

仲舒窺圃三年廢  
東野看花一日多

塵史子仲氏光輔元祐丁卯應詔季道輔  
錢於郊舉光輔舊詩云云光輔笑曰我尙  
能爲此語邪明年失意會有詔經行士未  
得黜落具名以聞於是有所旨令與特奏名  
唱名第一賜同五經出身予時自唐易守  
邠待次光輔榮歸爲學尚不輟八月末爲  
往州北視亡妻孫氏塋地還次近郊馬逸  
而墜內傷殊甚十日而卒看花一日多遂  
識耶成其詩

王伯虎

字炳之福清人嘉祐四年進士累官建州司理  
參軍太常博士知饒州樞密院檢詳禮房文字  
刑部員外郎三山志八

送程給事知越州

閩通志八

會稽歸去兩朱輪青瑣恩輝笑買臣簫鼓放船纔汴  
岸壺漿迎馬卽鄉民夜撩詩臘邪溪月晝撥茶蹲禹  
井春器業並聞裴垍薦莫將清興爲吳蓴

長雲千里海邊城兩粵今傳惠愛聲帝載待咨唐岳  
牧郡符還屈漢公卿天墀面拜恩綸重江國人瞻畫  
繡榮府掾塵埃歸未得鄉心先已逐雙旌會稽掇英續集

武昌

杯湖風舞翠絳轉樊山煙鎖青螺堆

輿地紀勝

避暑宮

離宮避暑今安在英雄埋沒隨空埃

同上

關景仁 廬有

鳬鷺亭詩

古有鳬鷺詩喜物遊太平今見鳬鷺樂爲作鳬鷺亭  
夜安州渚棲晝無羅網驚羣嬉固儔匹適意相飛鳴  
春風藻荇稠夜雨波瀾清特以王澤深遂此微物生  
飛甍枕秦臺繚繞寒蕪城俯目瞰清泚日羨鳬鷺情  
自惟縣令暇朝夕親編氓土瘠民半餒役頻民少寧  
嗟爾多蹙迫豈與鳬鷺并我心徒爾嗟柰何存典刑  
勞爾憫以恕爾重移之輕庶幾皆有樂共戴君聰明  
民安令亦暇臨流解塵纓卒歲可歸去白髮南山耕

徐州府志

莊公岳

惠安人嘉祐四年進士累官司農寺丞秘書丞  
成都提刑吏部右侍郎元祐初上疏極諫時事  
聖書褒荅見欒城集福建志

此君堂

使君新構此君堂手植玲瓏玉萬行洗濯清風消暑  
晝敵摩直節任寒霜蕭森一逕長年碧灑落高軒四  
座涼金筍高飛賓就醉夜深留待月華光朱詩拾遺

晁端彥厲有

字美叔清豐人與東坡同年及第嘗提舉兩浙  
刑獄紹聖間爲秘書少監以直秘閣知陝州提  
舉崇福宮改知潭州

月霞山

白鶴山頭飛瀑玉簫峯頂生烟溪上空聞流水竹間  
不見眞仙東甌金石志

淮陰有韓亭枚亭步亭艤舟亭下作

韓枚步隲建三亭故顯當時將相名遐想古人興廢  
事迺知英傑此中生輿地紀勝

無心亭

偶坐茲亭上清風吹客襟孤雲方出袖相對兩無心  
同上

姚勵

字輝中越州山陰人嘉祐四年進士厯官秘書  
丞起居舍人遷起居郎權給事中國子祭酒紹  
聖中貶水部員外分司南京尋卒崇甯中入黨  
籍後贈寶文閣待制

奉陪蓬萊閣賞雪賦詩成二十四韻呈知府

龍圖侍郎

一氣運轉無時停陰陽消長權相仍不有栗烈謹閉

固安得生育萬化興東南之土苦妍暖大冬往往水  
不冰有時草木自發洩百蟲百蟄飛蚊蠅特郎下車  
庶事飭威行恩煦瞻風稜宿姦竄伏善民裕眾強不  
敢暴與陵剛柔設施既得理律呂感召還相應先春  
未臘已見雪平地一色迷溝塍寒華浩蕩失舞鶴逸  
勢飄突回飛鶯不唯盡掃氛祲息便使歲善倉箱登  
蓬萊高閣倚巖壑下見羣巒千萬層其間賦象不可  
數一一焜耀光彩凝會稽山水天下勝於此更可窮  
誇矜無風四面捲簾幕坐上眾客羅簪朋分題行酒  
各壯浪浩然萬慮何泓澄抽毫沓簡公已賦欲敵妙

句誰其能小生學力最卑弱懦氣鬱鬱唯墳膺往時  
微之訪安道剡溪扁舟夜獨乘隱淪閑事至微小史  
筆猶爲千載稱豈如公今爲侍從器業天子之股肱  
擁麾一方聊撫俗瑞至應節如糾繩處之廟堂燮天  
下和氣自足康黎蒸良辰樂事固可紀欲寫但愧才  
弗勝他年收拾入房策豈獨佳話口所騰以上會稽  
掇英集

于房

浦江人嘉祐四年進士官至屯田員外郎通判  
應天府南京留守司

題左溪齊雲閣

藍輿遊古寺危閣倚天外山川混一色雲霞忽萬態  
啼鳥聲交呼牧豎歌相對凭欄增氣味披襟絕埃壘  
飛泉出陰窗清風來向背文酒歡賓朋樂哉時褫帶

胡宗愈屬有

鳬鷺亭

君爲鳬鷺亭更作鳬鷺詩鳬鷺爲鳥雖甚微君心仁  
愛乃在茲不忍壯者弋其母兒童捕其兒鳬鷺母子  
何嬉嬉城頭草靜烟雲迷城下水暖菰蒲低鳬鷺朝  
傍雲烟飛倦來暮入菰蒲棲寄巢生子冬復夏巢穩  
子大無人知我思入境觀君爲坐見三異於今時知

君官久行亦歸亭上引滿傷別離豈惟豐人惜君去  
雖我亦爲鳬鷺悲

徐州府志

和遊五泄書呈完夫節推

喜陪詩伯尋幽去從此風騷覺有神明代應無高遜  
士奇峯盡屬苦吟人欲名地巧題難得郤恨圖經說  
未眞回想天童山迤邐更名形勝亦非倫

會稽掇英集

王達

濮陽人嘉祐四年知金州工部郎中直龍圖閣  
提舉兗州景靈宮

釣臺

一句能通萬世情若非高位卽嘉聲如何自古留題  
者不悟嚴光解釣名

嚴陵集

趙文昌

嘉祐四年十一月比部員外郎知宜興縣

天目山

天目山前分兩乳一脉西來纏右股澗流疑是武陵  
源入山絕似盤之阻椒巒隱隱入霄漢從此去天纔  
尺五飛泉口作千丈潭下有蛟龍潛水府玉芝瑤草  
淨如拭不見塵寰一坯土三神山遠未易到洞天只  
在溪之澗道人宴坐疑不動一榻雲煙幾寒暑乍逢

佳客喜盈頰上山下山若飛虎龜腹燕領好顏色見  
鳥御風輕步武蘋蘩蘊藻盈傾筐砧几猩々不登俎  
贏劉顚蹶問不知那識人間有簪組嗟予碌碌退不  
勇竊食大官無寸補回頭四十九年非白髮手搔不可  
數山禽喚我歸去來言心已許長安冠蓋多豪傑誰肯論交到爾汝

於潛縣志

李挺

穎川人嘉祐五年臨潼主簿元祐丁卯知遂寧府

余嘉祐中嘗迎先妣來主臨潼口元祐丁卯知遂寧

月赴守遂寧復過是邑凡山林宮寺之勝皆當  
日奉板輿蓋朋簪歲時游息之處到今二十八  
年矣因成短詩以敘感慨

淒涼感舊與懷親時事居人觸目新獨有溫泉故情  
在猶能爲我洗紅塵

挈家登朝元閣晚由東山北下自石甕過朝元  
山路并斯飛亭皆當日親爲開置今復經從因

留拙句

一別驪山歲已深林花依舊繡蒼岑歸尋當日新開

路尋約苔痕下翠陰翠陰亭乃開元時勝  
概今路在亭基之上

題靈泉觀

山原繚繞水榮紆繡嶺屏風立座隅更上朝元最高處  
饒君都看渭川圖以上金石萃編

杜敏求

字拙翁眉州人嘉祐六年進士授簡州司理參軍元祐四年舉館閣清要見范太史集手記紹聖中太

學博士

宛炎錄  
二集

累官漢州什邡縣潤州通判定

州通判大觀初梓州路轉運判官提點刑獄建

中靖國元年卒于官年六十四有文集二十卷

淨德集二十四

運司園亭詩

西園

潭潭刺史府宛在城市中誰知園亭勝似與山林同  
幽鳥語晴晝好花嬌春風物情如有待賦詠屬詩翁

玉谿堂

堂前對花柳堂後瞰沼沚賢者堂中人虛心湛如水

煩暑當風窗中宵隱月几作詩紀勝槩詩與水清泚

雪峯樓

西山最高峯積雪連四季登樓試寓目八國有故地  
羨候雖久息武經思豫備文饒昔籌邊公意今無愧

海棠軒

東風開百花獨有海棠勝猩血染珠璣點綴枝條贍  
日暖錦段新雨餘燕脂凝何待東閣梅方能動詩興

月臺

明從海上來皎皎入我牖何如登高臺對月把尊酒  
問月月無言浩歌詩千首幾人知此樂此樂公所有

翠錦亭

材大難爲用嘗誇古柏篇亭前老梗楠黛色亦參天  
夏暑借清陰秋籟得自然有如愛庭楸朝暮東西偏

溪玉亭

林亭幽且深砌下玉谿水淙琤環珮聲曉夕清心耳  
使君性所樂愛玩不少已方持利物心默坐窮至理

茅庵

深深竹林下圓庵最幽僻高懷本恬曠野趣助閒適  
眾人奔名徒浮世繁物役豈知庵中樂道勝心自逸

水閣

方池導流水橫閣上尋丈晨曠夜月光罩影相滉漾  
游魚時出沒飛鷗亦下上終朝倚欄杆不見有風浪

小亭

二亭雖云小好在泉石間白石自齒齒清泉亦潺潺  
公府無留事暫來寄余閑筇杖鳥角巾一日幾往還

成都文類

閨雨

農夫苦相問燮理是何人

黃仲

字彥發邵武人嘉祐六年進士知河南縣擢知

泉州官至太僕司農卿與兄僅弟侑齊名時比  
之河東三鳳

黃鶴樓

乘鶴仙人去不回空名黃鶴舊樓臺陽冰健筆龍蛇  
勢崔灝清篇錦繡才輿地紀勝

黃廉

廉字夷仲分寧人庶弟嘉祐六年進士授宣州  
司理參軍改秘書省著作佐郎累官至集賢殿

修撰

石潭院次蟾禪師韻

一鉢誰知去住空前朝遺事寄禪宮孤吟盤礴數行  
墨古韻蕭條四壁風遊客落帆頻上下荒庭疏樹幾  
青紅有人會得詩中趣日月由來亦轉蓬

江西詩徵

### 勸學

河東人物氣勁豪澤州學者如牛毛大家子弟美文  
墨其次亦復誇弓刀去年校射九百人五十八人同  
賜袍今年兩科取進士十子鈞海登靈鼈邇來習俗  
益遷善家家門戶爭相高驅兒市上買書讀寢使田  
間禾不薅我因行縣飽聞見訪問終日忘勤勞太平  
父老知此否語汝聖世今難遭欲令王民盡知教先

自鄉里蒸羣髦古云將相本無種從今著意鞭兒曹  
留題洪慶觀

隔岸山如戲獅子背看松林閒掉尾天際蒼茫落數  
峯青虬下飲黃河水洪濤日夜洗崖腳容易沙洲忽  
生嘴浮嵐積靄增氣象因抱湯城來迤邐聖世封疆  
屬鄉縣令宰衙門對山起朝看片雲浮簷棟暮雨逡  
巡周百里可憐居民老蒼翠未省勞生有塵滓乘輶  
亦復愧斯人特地郵亭解行李

過靈泉寺四首

烏噪僧眠春晝遲松陰樓殿日高時入門未脫征裘

立拂壁先看學士詩

六年道路三經此山色泉聲似故人慚愧老僧相慰問官郎何事過門頻

瘦馬行行不著鞭一逢泉石便留連每來無可相求索只是松牕借榻眠

攬勝尋幽本爲閒可能忙裏去游山權宜且輞公家事看徧林泉夜始還以上山西通志

次韻黃魯直嘲小德小德魯直子其母微故其詩云解著潛夫論不妨無外家進饌客爭起小兒那可涯莫欺東方星三五自橫斜

名駒已汗血老蚌空泥沙但使伯仁長還興絡秀家

義寧州志

和魯直送雙井茶

江夏無雙種奇茗汝陰六一誇新書磨成不敢付童  
僕自看雪湯生璣珠列仙之儒瘠不腴只有病渴動  
相如明年我亦東南去畫舫何妨宿太湖

義寧州志

贈山谷子相

黃童三尺世無雙筆頭滾滾懸秋江不憂老子難爲  
父平生倔強今心已一作降我來喜共阿戎語應敵縱  
橫如急雨生子還如孫仲謀豚犬謾多何足數黃家

小兒名拾得眉如長松眼如漆只今數歲已動人老  
人留眼看他日義君老蚌生明珠自笑此物吾家無  
君當置酒我當賀有兒傳業更何須

義甯州志

杏苑亭

繁花影浸碧波紅苑似桃源勝境中不獨杏壇春晝  
永斯亭今亦繼遺風

義甯州志

陳睦

字和叔一字子雍莆田人徙家蘇州嘉祐六年  
進士熙寧三年遷秘書郎同知太常禮院出爲  
兩浙提點刑獄擢拜監察御史元豐累遷史館

修撰改鴻臚卿以寶文閣待制知廣州移知潭  
州卒

題東老庵

憶昔曾來訪隱淪瀟然雲水隔凡塵画船祇載溪中  
月白酒長添座上春晝掩山扉無俗客夜吟石鼎有  
高人飄飄洒落青衫子其話平生淚滿巾

東林山志

送程給事知越州

孔幾佳政在番禺嚴助終年厭直廬欲解塵纓臨曲  
水忽驚計吏拜高車行歸天上參鵠侶暫向江邊駐  
隼旛正想題詩憑郡閣秋波綠浮落芙蓉會稽報英  
續集

蔡瑗

字希邁龍溪人嘉祐六年進士官至朝請大夫  
歷典五郡徽宗時上封事請法商三宗嚴畏周  
文王無逸深見嘉納除江淮荆浙福建廣南等  
路提點坑冶文章政事有名于世而聲律尤長  
雉山院

白雉聞經向此山轉身來伴老僧閒大都見善能開  
悟天上人間任往還

廣西通志勝蹟

高鑄

字時和厯陽人和州籍嘉祐六年進士元祐元

年權廣東轉運司

題碧落洞

豁見仙源欣翠嵒曾無鑠鑰易躋攀臨流便解塵纓  
濯不信區區仕路難

廣東通志  
金石畧

高衡

鋪子

題碧落洞

仙府沈沈盡日開霓旌鶴駕幾徘徊青雲有路容人  
到煮茗浮觴不忍迴

廣東通志  
金石畧

江衍

字巨源蘭溪人嘉祐六年進士累官山陰鄞縣  
主簿熙寧中廬州觀察推官六年以曾布薦爲  
司農寺勾當公事元豐五年奉議郎以瀘州軍興  
不乏遷一官六年京西轉運判官四川提舉見  
蘭溪志通鑑長編安岳集

和孔司封題蓬萊閣

巍寄龍蟠最勝山神仙琳館落人間差差萬井庭闈  
布矗矗羣峯屏障環入座湖光浮蕩漾俯簷雲影過  
爛煥登臨自有飄然思便覺身同白日閑會稽掇英  
集

胡宗哲

昆陵人嘉祐六年進士

巾山廣軒

昔人亭榭久荒殘今復高軒峙翠巒眺望可周千里  
景宴遊非止一時權樓臺遠近看如画日月高低轉  
似丸最好使君登覽罷夕陽羣騎簇雕鞍

天台續集

江派

嘉祐六年登仕郎守河中府永樂縣令

涼軒

一軒新創定清涼岸幘披襟暇日長極目閒田虞與  
芮凝神虛室老兼莊簷牙高揭啄山色簾角平舒約

水光料得北窗風更細何妨笑傲比羲皇

山西通志

焦千之

字伯強丹徒人嚴教方正歐陽修趙槩呂公著皆敬之嘉祐六年召試舍人院賜出身爲國子監直講熙寧初改殿中丞出知樂清縣八年移無錫縣見京口耆舊傳

題慧山寺

余愛茲山昔屢遊回環氣象冷清幽茂林鬱蔚山蒼翠宴坐瀟灑風颸颸密繁積蘚迸泉眼飛輩比翼參雲頭一徑誰開青步障客來共泛紫玉甌每思乘興

好獨往塵纓未濯莫我留勝遊未到心先厭健步歷覽氣挾軒生平趣向與時背泉石夙志畧已酬茲山獨以泉品貴乃得嘉名傳九州譬人其中貴有物源深混混難窮搜支公去此久愈愛目我佳句忘百憂

昆陵

志

文君宅

文君姓張名薦見方輿勝覽溫州白鶴山

曾是文君宅幽深鎮翠岑澗松迷白鶴溪石隱黃金丹竈今猶在簫台迹可尋予來不能厭誰共聽泉音

溫州府志古迹

樊宗簡

嘉祐六年殿中丞簽書陝州觀察判官騎都尉

涼軒

邑署開軒檻景閒宜快襟簷虛月光上地僻暑甯侵  
夕照亂山遠風清羣水深政成足優逸好自撫鳴琴

山西

通志

張鍔

嘉祐六年祕書省校書郎守陝 縣令

涼軒

瀟洒吳夫子構軒山縣中何曾知大暑每到便清風  
林影亂不定泉聲咽復通微吟傾白酒日月任西東

山西  
通志

張允

嘉祐六年將仕郎守夏縣主簿

涼軒

涼軒無限景茂宰樂清閒拂榻夜延月捲簾時對山  
泉聲來檻曲野色入簷間遙憶琴樽會吟遊路險難

山西  
通志

郎几

字康伯河東人嘉祐六年保平軍節度判官試  
大理評事累官推官衛尉寺丞見臨川人及華

嶽題名涼軒石刻

涼軒

偉哉言偃室室外構涼軒到覺一襟爽坐祛三伏暄  
植筠憐節操引水愛潺湲公暇無餘事逍遙此釋煩

山西通志

王辟疆

嘉祐六年著作佐郎簽書虢州軍事判官熙甯九年太常博士

涼軒

谿山環繞古城深賢尹開軒日醉吟大抵清虛雖得

地從來安靜本由心朝揮玉塵風生座夜撫瑤琴月  
滿襟應笑陶潛種楊柳五株門外不成陰

山西通志

留題淡山巖

洞府深沉別有天石門相貫碧孱顏鑿開混沌千年  
竅坼破蓬萊一朶山日玩嵌空僧不厭時探幽怪客  
忘還若教元子當初到肯使朝陽播世間

零陵縣志

李鵬

字萬里嘉祐六年秘書省校書郎知唐州比陽

縣事

涼軒

盛夏暑已極此軒涼復生天除前吏酷地借長官清  
種竹風千樹敵暮月一枰方知北窗傲不獨是淵明

山西通志

山西通志

杜叔獻

嘉祐六年尙書屯田員外郎知平陸縣騎都尉

涼軒

縣僻少逢迎閒軒得創營先秋嵐氣肅涉夏竹風清  
待月詩中趣分泉枕畔聲憑君植春柳高節繼淵明

山西通志

宋詩紀事補遺卷十五男侍讀銜內閣中書樹藩校